

VENDIM
Nr.864, datë 23.7.2010

**PËR PAJISJEN ME NUMËR TELEFONI CELULAR TË PERSONAVE JURIDIKË,
PUBLIKË**

Në mbështetje të nenit 100 të Kushtetutës, të nenit 16 të ligjit nr.9936, datë 26.6.2008 “Për menaxhimin e sistemit buxhetor në Republikën e Shqipërisë”, si dhe të nenit 10, të ligjit nr.10 190, datë 26.11.2009 “Për buxhetin e vitit 2010”, të ndryshuar, me propozimin e Ministrit të Financave, Këshilli i Ministrave

VENDOSI:

1. Punonjësve të administratës publike, bazuar në funksionet që kryejnë, u ofrohet shërbimi i telefonisë celulare sipas specifikimeve të këtij vendimi. Shpenzimet për këtë shërbim, në nivel vjetor, përjashtuar shpenzimet për shërbimin sipas pikave 2, 3 e 10 të këtij vendimi, të jenë në çdo rast, jo më shumë se 2% e totalit të shpenzimeve për mallra dhe shërbime, të miratuara për çdo institucion në buxhetin vjetor përkatës.

2. Ky shërbim mund t’u ofrohet, edhe me dalje ndërkombëtare dhe pa asnjë kufizim në mbulimin e shpenzimeve nga buxheti i institucionit, funksionarëve, sipas lidhjes nr.1, që i bashkëlidhet këtij vendimi dhe është pjesë përbërëse e tij.

3. Ky shërbim mund t’u ofrohet, edhe me dalje ndërkombëtare, por jo më shumë se 63 000 (gjashtë e tre mijë) lekë në muaj, funksionarëve, sipas lidhjes nr.2, që i bashkëlidhet këtij vendimi dhe është pjesë përbërëse e tij.

4. Ky shërbim mund t’u ofrohet, edhe me dalje ndërkombëtare, por jo më shumë se 60 000 (gjashtëdhjetë mijë) lekë në muaj funksionarëve, sipas lidhjes nr.3, që i bashkëlidhet këtij vendimi dhe është pjesë përbërëse e tij.

5. Ky shërbim mund t’u ofrohet, edhe me dalje ndërkombëtare, por jo më shumë se 50 000 (pesëdhjetë mijë) lekë në muaj, funksionarëve, sipas lidhjes nr.4, që i bashkëlidhet këtij vendimi dhe është pjesë përbërëse e tij.

6. Ky shërbim mund t’u ofrohet, edhe me dalje ndërkombëtare, por jo me shumë se 35 000 (tridhjetë e pesë mijë) lekë në muaj, funksionarëve, sipas lidhjes nr.5, që i bashkëlidhet këtij vendimi dhe është pjesë përbërëse e tij.

7. Ky shërbim mund t’u ofrohet, edhe me dalje ndërkombëtare, por jo më shumë se 13 000 (trembëdhjetë mijë) lekë në muaj, për funksionin “zëvendësministër”.

8. Ky shërbim mund t’u ofrohet, edhe me dalje ndërkombëtare, por jo më shumë se 10 000 (dhjetë mijë) lekë në muaj, funksionarëve, sipas lidhjes nr.6, që i bashkëlidhet këtij vendimi dhe është pjesë përbërëse e tij.

9. Ky shërbim mund t’u ofrohet, dhe me dalje ndërkombëtare, por jo më shumë se 4 000 (katër mijë) lekë në muaj, për funksionin “drejtor drejtorie në ministri” (niveli II-b), si dhe çdo funksionari të barazuar në pagë apo me pagë përkatëse më të madhe se ky funksion. Në këtë kategori përfshihen edhe funksionet “këshilltar” apo “zëdhënës shtypi” që kanë pagë të këtij niveli.

10. Shërbimi i telefonisë “Roaming” ofrohet pa pagesë për të gjitha telefonatat zyrtare të kryera nga jashtë vendit, për funksionin: “zëdhënës shtypi/këshilltar për median” i Presidentit, i Kryetarit të Kuvendit, i Këshillit të Ministrave dhe i Kryeministrit.

11. Drejtuesit e organeve të pushtetit vendor kanë të drejtë të urdhërojnë pajisjen me numër telefoni celular të personave zyrtarë, bazuar në detyrën që kryejnë dhe brenda fondeve të parashikuara në buxhetin vjetor, sipas specifikimeve të mësipërme. Shpenzimet për këtë shërbim, në nivel vjetor, të jenë në çdo rast, jo më shumë se 2% e totalit të shpenzimeve për mallra dhe shërbime, të miratuara për çdo institucion në buxhetin vjetor përkatës.

12. Drejtuesit e njësive të fondeve speciale kanë të drejtë të urdhërojnë pajisjen me numër telefoni celular të personave zyrtarë, bazuar në detyrën që kryejnë dhe brenda fondeve të parashikuara në buxhetin vjetor, sipas specifikimeve të mësipërme. Shpenzimet për këtë shërbim, në nivel vjetor, të

jenë, në çdo rast, jo më shumë se 2% e totalit të shpenzimeve administrative (pa koston e personelit), të miratuara për çdo institucion në buxhetin vjetor përkatës.

13. Drejtuesit e ndërmarrjes/shoqërisë tregtare me kapital 100 për qind shtetëror, që funksionojnë sipas ligjeve specifike përkatëse, kanë të drejtë të urdhërojnë pajisjen me numër telefoni celular të personave zyrtarë, bazuar në detyrën që kryejnë dhe në varësi të mundësive financiare që kanë, të miratuar nga organet përkatëse, sipas specifikimeve të mësipërme. Shpenzimet për këtë shërbim, në nivel vjetor, të jenë në çdo rast, jo më shumë se 2% e totalit të shpenzimeve administrative, të miratuara në planin financiar përkatës.

14. Njësitë e qeverisjes qendrore, vendore apo fondeve speciale, lidhin kontratat për këtë shërbim me cilindo prej operatorëve telefonikë që veprojnë në vend, të cilët kanë epërsi në përmbushjen e këtyre kushteve:

- ofrojnë çmimin më të ulët;
- ofrojnë cilësinë më të mirë;
- ofrojnë shtrirjen më të gjerë të mbulimit me sinjal.

15. Në çdo rast, shërbimi i ofruar nga institucioni paguhet sipas faturës mujore për vlerën e shpenzuar. Çdo tejkallim i limitit mujor, të përcaktuar sipas pikave 3-9 të këtij vendimi, nuk kompensohet me limitin e muajit pasardhës dhe përballohet nga vetë personi zyrtar.

16. Vendimi nr.343, datë 11.7.2002 i Këshillit të Ministrave “Për pajisjen me numër telefoni celular të personave juridikë, publikë”, i ndryshuar, shfuqizohet.

Ky vendim hyn në fuqi pas botimit në Fletoren Zyrtare dhe i shtrin efektet financiare nga data 1 nëntor 2010.

KRYEMINISTRI
Sali Berisha

Lidhja nr.1

1. Presidenti i Republikës
2. Kryetari i Kuvendit
3. Kryeministri
4. Kryetari i Gjykatës Kushtetuese
5. Prokurori i Përgjithshëm

Lidhja nr.2

1. Kryetari i Gjykatës së Lartë

Lidhja nr.3

1. Zëvendëskryetari i Kuvendit
2. Zëvendëskryeministri

Lidhja nr.4

1. Avokati i Popullit
2. Kryetari i Komisionit Qendror të Zgjedhjeve
3. Kryetari i Kontrollit të Lartë të Shtetit
4. Ministri
5. Drejtori i Shërbimit Informativ të Shtetit

Lidhja nr.5

1. Sekretari i Përgjithshëm në Presidencë, Kuvend, Këshillin e Ministrave
2. Drejtori i Kabinetit të Presidentit të Republikës, i Kryetarit të Kuvendit dhe i Kryeministrit, si dhe çdo funksionar i barazuar në pagë apo me pagë përkatëse për funksion më të madh se ky funksion.

3. Drejtori i Përgjithshëm i Policisë së Shtetit
4. Drejtori i Përgjithshëm i Doganave

5. Drejtori i Përgjithshëm i Tatimeve

Lidhja nr.6

1. Sekretari i Përgjithshëm në ministri
2. Drejtori i Drejtorisë së Përgjithshme, si dhe çdo funksionar i barazuar në pagë apo me pagë përkatëse për funksion më të madh se ky funksion.